

Naqqiut 3

Naqqiut 16. september 2019-imeersoq taarserpaa.

(Inatsisip kalaallisut oqaasertaani § 36, imm. 5-imi oqaatsip “angajoqqaatut oqartussaataitaasoq”-p oqaatsitigut erseqqissaavigineqarnera nutaaq)

Uunga siunnersuut: Isumaginninnermik suliassaqarfimmi pissaanermik atuineq pillugu Inatsisartut inatsisaata allangortinneqarneranik Inatsisartut inatsisaat nr. xx, xx. xxx 2019-imeersoq (Inatsisip kalaallisut oqaasertaani § 20, imm. 1-imi, § 31, imm 4-mi aamma § 36, imm. 5-imi oqaatsitigut erseqqissaaneq)
(Peqqissutsimut, Isumaginninnermut Inatsisinillu Atuutsitsinnermut Naalackersuisoq)

Saqqummiussissut

(Peqqissutsimut, Isumaginninnermut Inatsisinillu Atuutsitsinnermut Naalackersuisoq)

Siullermeerneqarnera

Inatsisartut inatsisaanni aalajangersakkani pingasuni kalaallisut qallunaatullu oqaasertaliussat imminnut naapertuutinngitsut paasineqarmat, isumaginninnermi suliassaqarfimmi pissaanermik atuineq pillugu Inatsisartut inatsisaata allangortinneqarneranik Inatsisartut inatsisissaattut siunnersuut manna Naalackersuisut saqqummiuppaat. Siunnersuummi inatsisip kalaallisut oqaasertaliussani § 20, imm. 1-imi, § 31, imm 4-mi aamma § 36, imm. 5-imi oqaatsitigut taamaallaat naqqiisoqarpoq.

Aalajangersakkanut kalaallisut qallunaatullu oqaasertaliussat imminnut naapertuutilernissaat siunnersuummi siunertarineqarpoq. Inatsisip kalaallisuuani § 20-mi imm. 1-imi allassimasoq ”matumani ilanngullugit pinerluttulerinnermi inatsimmi kapitali 2 malillugu illersuisariaqalernermi aamma ajornartuulernermi pininnaatitaanermi” ilanngunneqarsimangilaq. Kalaallisuuani § 31, imm. 4-mi oqaasertaliussat “”matuni silarlarni” aamma “piffissami killilimmi” ilanngunneqarsimangillat.

Pissaanermik atuinertit sorliit nalunaaquttap akunneri 24-t qaangiutsinnagit nalunaaruteqartarnermut immersugassami nalunaarsorneqartassanersut siunnersuutip kalaallisuuani erseqqissarneqarpoq, aamma piffissami killilimmi taamaallaat matunik ammaassutit immikkut ittut atortarneqartarnissaat erseqqissarneqarpoq.

Siunnersuutip kalaallisoortaani aammattaaq § 36, imm. 5-mi oqaatsitigut naqqiisoqarpoq, tassani oqaaseq “angajoqqaatut oqartussaasoq” “nakkutilliisoq”-mik taarserneqarluni.

Aalajangersakkat kalaallisoortaasa qallunaatoortaasalu akornanni oqaatsit erseqqissuunissaasa qulakkeerneqarnissaat siunnersuutikkut siunertarineqarpoq.

Naalackersuisut taamatut oqaaseqarlutik immikkoortoq Inatsisartunut oqaluuserisassanngortippaat.